



ТЕҢІЗДЕН ТАМШЫ ҚАЗАҚҚА БҰЙЫРА МА?

Қазақстанда Теңіз кен орнындағы «Келешек кеңею жобасының» шығыны 50 миллиард долларға жуықтап қалды. Бастапқыда шетелдік инвестор оның құны 12 миллиард доллардай ғана болатынына сендірген. Салдарынан, сарапшылардың айтуынша, бұл кен орнынан қосымша өндірілетін мұнайдың бәрі оның шығынын өтеуге ғана жетуі мүмкін.



ҮШ РЕТ ШЕГІНГЕН ЖОБА

Ресми мәлімет бойынша, Қазақстанда қазіргі уақытта 104 мұнай-газ компаниясы 295 кен орнын игеріп жатыр. Алайда соның ішінде тек үшеуі аса ірі саналады. Атап айтқанда, дүниежүзінде бар қырық шақты ғана жаһандық «супергигант» (supergiant) кен орны қатарына кіретін Теңіз, Қарашығанақ және Қашаған республикада өндірілетін бүкіл кара алтынның 60-70%-ын береді.

Соның ішінде Теңіз кен орны бірінші болып, қарқынды өндіріле бастады. Бұрынғы билік мұны – «ғасыр жобасы», ал 1992 жылы оған тартылған америкалық «Шеврон» компаниясын – Қазақстанның шетелдік ірі инвесторларының тұңғышы деп мақтан тұтты. Енді ше?

Энергетика министрлігінің мәліметінше, Теңіз жобасы түгелімен таяды, тиісінше, ондағы «Келешек кеңею жобасы» (ККЖ) – осы аса ірі жобаның

аяқтау сатысы саналады. Алып кен орнындағы мұнай өндірісін арттыру үшін қос жоба – аталған ККЖ және «сағалық қысымды басқару жобасы» (СКБЖ) қолға алынды. 2022 жылы әріптестер жобаның жанартылған құны мен графигін мақұлдаған еді. Сонда ККЖ-ның жалпы құны 46,7 миллиард долларды құраған. Жұмыстың жалпы ілгерілеуі 98,8%-ға бағаланды.

(Жалғасы 3-бетте)

АГРОӨНЕРКӘСІПТІ ДАМУ – БАСТЫ НАЗАРДА



Елімізде өнеркәсіп кешенін дамыту – басты мәселенің бірі. Президент Қасым-Жомарт Тоқаев ауыл мен агроөнеркәсіп кешенін дамыту мәселелері жөніндегі кеңесте ауыл халқының 85%-ы тұратын тірек ауылдарды дамыту аса қажет екендігін атап өткен болатын.

ШҰБАТТАН ШИПАЛЫ СУСЫН ЖАСАҒАН



Атыраулық ғалымның қант диабетіне шалдыққан науқастарға арналған шипалы сусыны өндіріске шығады. Өнім Маңғыстау облысында орналасқан AGARGAN ЖШС мен «Ғылым қорының» бірлесе қаржыландыруының нәтижесінде өндіріске шығарылатын болады.

ҮНДЕМЕС АУРУ ҮМІТТІ ҮЗІП ТҰР

Қазіргі қоғамда қатерлі ісік қаупі өршіп барады. Әсіресе, экологиялық ахуалы асқынған Сыр өңірінде онкологиялық аурулардың көрсеткіші оң нәтиже бермей тұр.

7 ►►



ПРЕЗИДЕНТ БОАО АЗИЯ ФОРУМЫНА ҚАТЫСАДЫ

Мемлекет басшысы Қасым-Жомарт Тоқаев Боао Азия форумының сессиясына қатысу үшін 28-29 наурыз күндері Қытай Халық Республикасына жұмыс сапарымен барады. Бұл туралы Ақорданың баспасөз қызметі хабарлады.

Президент бұл елде Боао Азия форумының сессиясына қатысады. Сондай-ақ ҚХР басшылығымен халықаралық ұйымдардың және Қытайдың ірі компанияның жетекшісімен бірқатар кездесу өткізеді деп жоспарланып отыр.

Анар ФАЗЫЛЖАН:

ҰЛТТЫҚ ҚҰНДЫЛЫҚТЫ ТІЛІМІЗДЕН ІЗДЕГЕН ЖӨН

15 наурызда Мемлекет басшысы Қасым-Жомарт Тоқаевтың төрағалығымен Атырау қаласында Ұлттық құрылтайдың үшінші отырысы өткен болатын. Биылғы жиында жалпыұлттық құндылықтар, елдік сана, мемлекеттік мүдде жайында көбірек мәселе қозғалып, ұсыныс-пікірлер талқыға салынды. Осы орайда Ахмет Байтұрсынұлы атындағы Тіл білімі институтының директоры, Ұлттық құрылтайдың мүшесі Анар Фазылжанды әңгімеге тартқан едік.



– Анар Мұратқызы, таяуда өткен Ұлттық құрылтайдың үшінші отырысында Президент Қасым-Жомарт Тоқаев мемлекеттік идеологияны орнықтыруда зиялы қауымның, ғалымдардың айрықша рөл атқаратынын айтты. Осыған қатысты ойыңызды білсек деп едік?

– Өткен құрылтайда Президент біздің қоғамымыздың рухани саламаттылығын сақтау үшін қажетті аса маңызды мәселелерді көтерді. Оның ішінде есірткіге, лудоманияға қарсы, жасөспірімдер арасындағы әлімжеттік, отбасындағы қатыгездікпен күрес сияқты қоғамды мазалап отырған мәселелер бар. Бұлардың барлығының шешімі жалпыұлттық құндылықтарды нығайту мен күшейтуде жатыр. Енді осы «жалпыұлттық құндылықтар дегеніміз не?» деген сауалға тілтанушы көзқарасы тұрғысынан нақты, бейнелі жауап беруге тырысып көрейік. Мәселен, бөлмеге үлкен кісі кіріп келді делік, егер сіз төрде отырсаңыз, орныңызды бересіз. Сізді мұндай әрекет, қимыл-қозғалысқа итермелеп тұрған не? Ол – қазақ тіліндегі «төр» деген сөздің мағынасын білуіңіз, астарындағы мазмұнды түсінуіңіз. Егер қазақ тілін, ондағы «төр» деген сөздің мағынасын, төрде жасы үлкен, қадірлі ақсақалдың отыратыны туралы мәліметті білмесеңіз, онда сіз мұндай қимыл-қозғалыстарды жасамайтын едіңіз. Яғни, бұл жердегі жасы үлкен кісіні сыйлау, құрметтеу деген құндылықты қазақ халқы «төр», «ақсақал», «үлкенге төрден орын беру», «төрде отыру» сияқты тағы басқа осындай тілдік бірліктердің мазмұнына сақтап қойған.

(Жалғасы 5-бетте)



ЖЕМҚОРЛАРҒА КЕШІРІМ БОЛМАУЫ КЕРЕК

Жемқорларды заңмен жазалағанда аяушылық болмау керек. Соның ішінде мүлкін тәркілеу жағы елімізде әлсіз болып тұр. Осы кемшілік олардың жазасын түрлі жолдармен тез өтеп шығып, одан әрі шалқын өмір сүруіне мүмкіндік беріп отыр. Сарапшылар оны қатаңдатудың тиімді жолдарын ұсынады.

6 ►►

